

Sulinermik Inuussutissarsiuteqartut Kattuffiata (SIK-p) malittarisassai

Kattuffiup aqqa najugaqarfialu

§ 1.

Kattuffiup aqqa tassaavoq Sulinermik Inuussutissarsiuteqartut Kattuffiat (SIK), Kalaallit Nunaanni sulinermik inuussutissarsiuteqartut kattuffigisaat.

Imm. 2. Kattuffik Nuummi inissisimavoq.

Siunertat

§ 2.

SIK imaattunik siunertaqarpoq:

- Akissarsiaqarnikkut atorfeqarnikkullu atugassarititaasunik kiisalu sullivinni avatangiisinik toqqissisimanartunik angusaqarnissaq sulisitsisunik isumaqatigiissuteqartarnerit aqputigalugit.
- Ilinniarnissamut suliffeqarnissamullu periarfissanik pitsaasunik angusaqarnissaq sulisitsisunik isumaqatigiissuteqartarnerit aqputigalugit.
- Suliffinni oqartussaaqataanermik angusaqarnissaq sulisitsisunik isumaqatigiissuteqartarnerit aqputigalugit.
- Soraarnerussutisiaqalersarnermik aaqjissuussinikkut utoqqalinermi inuuniarnikkut atugarisanik pitsanngorsaanissaq.
- Inatsisiliortarnermut sunniuteqarniarnissaq, pingaartumik suliffeqarneq, isumaginninneq, peqqinnissaq, sullivinni avatangiisit soraarnerussutisiaqarnerlu pillugit, taamaalilluni inuiaqatigiinni toqqissisimanarnerulerlunilu aningaasaqarnikkut naligiinnerulertoqarniassamat assigiinngisitsisoqannginniassammallu suaassuseq, kinguaassiuutitigut inooqatigiinneq, amqip qalipaataa, utoqqaassuseq, innarluuteqarneq, upperisaq imaluunniit politikikkikut sumik attaveqarneq apeqqutaatinnagit. Aammattaaq sulinermik inuussutissarsiuteqartut napparsimanerminni, naartunerminni, meerartaarnerminni aamma qitornarsiartaarnerminni kiisalu sulillutik ajutoorsimanermik atonerluisuunermilluunniit kingunerisaannik katsorsarneqarnerminni isertitamikkut sapinngisamik annaasaqannginnissaat inatsisiliornermut sunniuteqarniarnikkut suleqataaffigineqassaaq.
- Sulinermik inuussutissarsiuteqartut sulisinnaanngitsut suliffissaarussimasullu assigiinngitsutigut, tarnikkut timikkullu, nukittorsarneqartuarnissaat.
- Sulinermik inuussutissarsiuteqartut sulinerminni inuunerminnilu atugarisaannik inuiaqatigiit paasisaqartinneqartarnissaat.

- Suliassaalersuni ataasiakkaani ilaasortat sulisutut soqutigisamikkut tapersersortariaqarfiisigut siunnersortariaqarfiisigullu sullinneqarnissaat.
- Sulisut sinniisaasa suliffinnilu attuumassuteqartut allat qaammarsaavigineqartuarnermik-kut sulinermik inuussutissarsiuteqartut soqutigisaannik suliniuteqarnerminni nukittorsar-neqarnissaat.
- Nunani tamalaani sulinermik inuussutissarsiuteqartut kattuffiinik allanik suleqateqarnissaq SIK-p nunanilu allani kattuffiit taakkua attaveqatigiinnerat nukittorsarumallugu, nunani taakkunani sulinermik inuussutissarsiuteqartunut tamanut iluaqutissamik.

Ilaasortat

§ 3.

Kinaluunniit SIK-p siunertaanut § 2-mi taagorneqartunut tapersersuisoq ilaasortanngorsinnaavoq, tamatuma ataani

- sulinermik inuussutissarsiuteqartut suliffillit suliffissaaleqisullu
- lærlingit, ilinniartut praktikkertullu, kiisalu
- ilinniagaqartut

SIK-p aaqqissuussaanera

§ 4.

SIK-p aaqqissuussaanera imaappoq:

1. Ataatsimeersuarneq.
2. Nakkutilliisoqarfik.
3. Siulersuisuunerit.
4. Ulluinnarni aqutsisut.
5. Peqatigiiffiit.
6. Illoqarfinni nunaqarfinnilu peqatigiiffeqanngitsuni attaveqaatit.

Imm.2. SIK-p allattoqarfia ingerlataqarfinnut imm. 1-imi taaneqartunut pisariaqartutigut sullis-nermik siunnersuinermillu isumaginnittuovoq, taamatuttaarlu SIK-mut ilaasortaasunut pisari-aqartutigut ikiuullunilu siunnersuisassalluni.

Ataatsimeersuarneq

§ 5.

Ataatsimeersuarneq SIK-p oqartussaanerpaartaraa.

Imm. 2. Ukiut sisamakkaarlugit ataatsimeersuortoqartassaaq. Ataatsimeersuarneq aggstimi, septembarimi oktobarimiluunniit pisassaaq, siulersuisuunerillu ataatsimeersuariaqqusisassapput sivi-kinnerpaamik qaammatinik 5-inik sioqqutsillutik peqatigiiffinnut allagaqarnermikkut imaluunniit emailimik nassiussinermikkut, kiisalu SIK-p nittartagaatigut nalunaaruteqarnermikkut.

§ 6.

Uku ataatsimeersuarnermi peqataassapput:

- Aallartitat peqatigiiffiit § 7 naapertorlugu toqqagaat. Aallartitat taakku oqaaseqarsinnaatitaallutillu taasisinnaatitaapput.
- Siulersuisuunernut ilaasortat aallartitatut peqatigiiffinnit toqqagaanngitsut. Ilaasortat taakku oqaaseqarsinnaatitaallutillu taasisinnaatitaapput.

Imm. 2. SIK-mut ilaasortat kisimik ataatsimeersuarnermi peqataasussatut toqqarneqarsinnaapput.

§ 7.

Aallartitat ataatsimeersuarnermi peqatigiiffinnit peqataasussat amerlassusiat aalajangerneqassaaq SIK-p naatsorsuutai kukkunersiukkat kingulliit naapertorlugit agguaqatigiissitsinikkut ilaasortat amerlassusiat naapertorlugu. Taava amerlassusiliineqassaaq ima:

- | | |
|--------------------------------------|---------------|
| - Ilaasortat 35-nit 250-inut: | Aallartitaq 1 |
| - Ilaasortat 251-init 500-nut: | Aallartitat 2 |
| - Ilaasortat 501-init 750-inut: | Aallartitat 3 |
| - Ilaasortat 751-it amerlanerusullu: | Aallartitat 4 |

Imm. 2. Peqatigiiffiit ataatsimeersuarnissaq kingusinnerpaamik qaammatinik 3-nik sioqqullugu SIK-p allattoqarfianut nalunaaruteqassapput kikkut aallartitatut toqqarneqarsimanerannik.

§ 8.

Ataatsimeersuarnermi aalajangiinerit amerlanerussuteqarnikkut pisassapput malittarisassani allamik allassimasoqanngikkaangat. Siulersuisuunernut ilaasortassanik qinersinerni taasinernik naligiit-toqartillugu makitsinikkut aalajangiisoqartassaaq.

Imm. 2. Aallartitat, soorlu taaseqataasarsinnaassagunik, ataatsimeersuarnermut ornigullutik peqataassapput.

Imm. 3. Ataatsimeersuarnermi taasinerit aallartitat aqqinik suaaruteqarnikkut imaluunniit nappaanikkut pisassapput, ataatsimeersuarnermik aqutsisuusup qanoq aalajangernera apeqqutaaluni. Inunnik qinersinerit allalluni taasinnikkut pisassapput qinerneqartussanit amerlanerusunik qinigassanngortitsisoqaraangat.

§ 9.

Ullormut oqaluuserisassat minnerpaamik imaattunik immikkoortoqassapput:

1. Siulittaasup ammaanera.
2. Aqutsisussamik toqqaaneq.
3. Imaqarniliortussamik taasinnillu kisitsisussamik toqqaaneq.
4. Ullormut oqaluuserisassat akuerineqarnerat.
5. Siulersuisuunerit nalunaarutaat.
6. Naatsorsuutininik ilisimatitsissutitut saqqummiussineq.
7. Siunnersuutit tiguneqarsimasut oqaluuserineqarneri.
8. Ilaasortaanermut akiliutit aalajangerneqarnerat.
9. Kukkunersiuisumik akuerisaasumik toqqaaneq.
10. Siulersuisuunissanik qinersineq.
 - a. Siulittaasoq
 - b. Siulittaasup tullia
 - c. Ilaasortat 7
 - d. Sinniisussat 5
11. Taasariaqartut allat.

§ 10.

Peqatigiiffiit SIK-mut atasut ataatsimeersuarnermi oqaluuserineqartikkusutaminnik siunnersuuteqarsinnaapput. Siunnersuutit peqatigiiffiup siulersuisuini oqaluuserineqareersimassapput akuersisutigineqarlutillu.

Imm. 2. Siulersuisuunerit taamattaq siunnersuuteqarsinnaapput ataatsimeersuarnermi oqaluuserineqartikkusutaminnik.

Imm. 3. Peqatigiiffiit siunnersuutaat ataatsimeersuarnissaq kingusinnerpaamik qaammatinik 3-nik sioqqullugu SIK-p allattoqarfianit tiguneqarsimassapput.

Imm. 4. SIK-p siulittaasussaatur qinigassanngortitat SIK-p allattoqarfianut nalunaarutigineqassapput ataatsimeersuarnissaq kingusinnerpaamik qaammatinik 2-nik sioqqullugu.

§ 11.

SIK-p allattoqarfia ataatsimeersuarnissami atortussanik peqatigiiffinnut, siulersuisuunernut kiisalu aallartitassatut toqqakkanut nassiussissaaq ataatsimeersuarnissaq kingusinnerpaamik qaammamik 1-imik sioqqullugu. Atortussanut ilaapput ullormut oqaluuserisassanut siunnersuutit, siunnersuutit tiguneqarsimasut kiisalu naatsorsuutit.

Imm. 2. SIK-p allattoqarfiata tamatuma peqatigisaanik inuit attaveqaataasut § 35-mi taaneqartut atortussanik imm. 1-imi taaneqartunik nassissavai, taamaalillutik taakku ataatsimeersuarnissaq pil-lugu ilisimatitaaniassammata.

§ 12.

Aallartitat ataatsimeersuarnermi peqataasut siulersuisuunernut qinerneqarsinnaapput.

§ 13.

Ataatsimeersuarnermit imaqarniliaq siulersuisuunernut, peqatigiiffinnut, attaveqaatinut § 35-mi taaneqartunut kiisalu aallartitatut toqqakkanut SIK-p allattoqarfianit nassiunneqassaaq ataatsimeersuarnerup kingorna kingusinnerpaamik sapaatip-akunneri 3 qaangiutsinnagit.

§ 14.

SIK-p allattoqarfia ataatsimeersuarnermut atatillugu angalanernut, ullormusianut kiisalu nerisaqarnermut ineqarnermullu aningaasartuutissat pillugit ataatsimeersuarnissaq sioqqullugu aalajangii-sassaaq.

Immikkut ittumik ataatsimeersuarneq

§ 15.

Siulersuisuunernut ilaasortat 2/3-ii imaluunniit peqatigiiffiit 2/3-ii tamatuminnga piumasaqarpata immikkut ittumik ataatsimeersuortoqassaaq. Tamatuminnga piumasaqarnerup peqatigisaanik ullormut oqaluuserisassanik siunnersuuteqartoqassaaq.

Imm. 2. Immikkut ittumik ataatsimeersuarneq ingerlanneqassaaq tamatuminnga piumasaqaatip SIK-p allattoqarfianit tiguneqarneranit kingusinnerpaamik qaammattit 3 qaangiutsinnagit. Siulersuisuunerit immikkut ittumik ataatsimeersuarnissaq ullulissavaat.

Imm. 3. Immikkut ittumik ataatsimeersuarneq ingerlanneqassaaq § 6, § 7, imm. 1, § 8 kiisalu §§ 11-14 naapertorlugit.

Imm. 4. Peqatigiiffiit immikkut ittumik ataatsimeersuarnissaq sioqqullugu SIK-p allattoqarfianut nalunaarutigissavaat kikkut immikkut ittumik ataatsimeersuarnissamut aallartitatut toqqarsimanelrugit. SIK-p allattoqarfiata aalajangissavaa aallartitasssanik nalunaaruteqarnissaq tamanna kinsinnerpaamik qaqugu pissanersaq.

Imm. 5. Siulersuisuunerit aalajangissavaat immikkut ittumik ataatsimeersuarneq ornigulluni, telefonikkut imaluunniit qarasaasiatigut ingerlanneqassasoq.

Nakkutilliisoqarfik

§ 16.

Ataatsimeersuarnerit marluk akornanni Nakkutilliisoqarfik ataasiarluni ataatsimiittassaaq. Ataatsimiinnermi tassani makku sammineqarsinnaapput:

- Ataatsimeersuarnerit akornanni SIK-p ingerlatsinera aalajangiiffigissallugu.
- Isumaqatigiinniarnissani piunasaqaatissanik saqqummiussissalluni.
- Siulersuisuunerit ataatsimeersuarnermi nakkutilliisoqarfimmilu aalajangikkat naapertorlugit sulinerat nakkutigissallugu.
- SIK suliffeqarnerlu pillugit taasassat assigiinngitsut oqallisigissallugit.
- Ilaasortat kattuffimmut akiliutissaat ataatsimeersuarnermi aalajangikkat allanngortinneqassanersut aalajangiiffigissallugit.

Imm. 2. Nakkutilliisoqarfik qaqugu ataatsimiissanersaq siulersuisuunerit aalajangissavaat.

§ 17.

Nakkutilliisoqarfik ukuningga inuttaqarpoq:

- Peqatigiiffiit SIK-mut atasut tamarmik 1-imik aallartitaqassapput peqatigiiffiit siulersuisuisa toqqagaannik. Aallartitatut toqqakkat taakku oqaaseqarsinnaatitaallutillu taasisinnaatitaapput.
- Siulersuisuunernut ilaasortat peqatigiiffinnit aallartitatut toqqagaanngitsut. Ilaasortat taakku oqaaseqarsinnaatitaallutillu taasisinnaatitaapput.

Imm. 2. SIK-mut ilaasortat kisimik nakkutilliisoqarfimmi aallartitatut toqqarneqarsinnaapput.

Imm. 3. Nakkutilliisoqarfik siulersuisuunernit ataatsimiigiaqquneqartassaaq sivikinnerpaamik qaammatinik 5-inik sioqqutsisumik, peqatigiiffinnut allakkatigut imaluunniit e-mailikkut, SIK-llu nit-tartagaatigut nalunaaruteqartumik.

Imm. 4. Peqatigiiffiit ataatsimiinnissaq kingusinnerpaamik qaammatinik pingasunik sioqqullugu SIK-p allattoqarfianut nalunaarutigissavaat kikkut Nakkutilliisoqarfiup ataatsimiinnerani peqataatinniarnelugit.

§ 18.

Peqatigiiffiit aamma siulersuisuunerit nakkutilliisoqarfimmi oqaluuseritikkusutaminnik siunnersuuteqarsinnaapput. Peqatigiiffiit siunnersuutaat peqatigiiffiup siulersuisuini oqaluuserineqaaqsimmassapput akuersissutigineqarlutillu.

Imm. 2. Peqatigiiffiit siunnersuutaat SIK-p allattoqarfianit tiguneqarsimmassapput nakkutilliisoqarfiup ataatsimiinnissaa kingusinnerpaamik qaammatinik 3-nik sioqqullugu.

Imm. 3. SIK-p allattoqarfia nakkutilliisoqarfiup ataatsimiinnerani atortussanik peqatigiiffinnut, siulersuisuunernut aamma ataatsimeeqataasussatut toqqakkanut nassiusissaaq ataatsimiinnissaq kingusinnerpaamik qaammammik 1-imik sioqqullugu. SIK-p allattoqarfiata tamatuma peqatigisaanik attaveqaatit § 35-mi taaneqartut atortussanik taakkuninga nassissavai ilisimatitsissutitut.

§ 19.

Nakkutilliisoqarfiup ataatsimiinnerani aalajangiinerit amerlanerussuteqarnikkut pisassapput, malit-tarisassani allamik allassimasoqangippat. Aallartitat, soorlu taaseqataasarsinnaassagunik, Nakkutilliisoqarfiup ataatsimiinneranut ornigullutik peqataassapput.

Imm. 2. Taasinerit taasisinnaatitaasut aqqinik suaaruteqarnikkut imaluunniit nappaanikkut pisassapput, ataatsimiinnermik aqutsisuusup qanoq aalajangiinera apeqqutaalluni, ataatsimiinnermi peqataasut ikinnerpaamik 2/3-ii allalluni taaisoqarnissaanik piumasaqangippata.

§ 20.

Ullormut oqaluuserisassat minnerpaamik imaattunik immikkoortoqassapput:

1. Siulittaasup ammaanera.
2. Aqutsisussamik toqqaaneq.
3. Imaqarniliortussamik taasinernillu kisitsisussanik toqqaaneq.
4. Ullormut oqaluuserisassat akuerineqarnerat.
5. Siulersuisuunerit nalunaarutaat.
6. Naatsorsuutininik ilisimatitsissutitut saqqummiussineq.
7. Siunnersuutit tiguneqarsimasut oqaluuserineqarneri.

8. Ilaasortat kattuffimmut akiliutissaasa ataatsimeersuarnermi aalajangikkat allanngortinneqarsinnaanerat.
9. Taasariaqartut allat.

§ 21.

Nakkutilliisoqarfiup ataatsimiinneranit imaqarniliaq peqatigiiffinnut, attaveqaatinut § 35-mi taaneqartunut, siulersuisuunernut kiisalu Nakkutilliisoqarfiup ataatsimiinnerani peqataasunut SIK-p allattoqarfianit nassiuuneqassaaq ataatsimiinnerup kingorna kingusinnerpaamik sapaatip-akunneri 3 qaangiutsinnagit.

§ 22.

SIK-p allattoqarfia nakkutilliisoqarfiup ataatsimiinneranut atatillugu angalanernut, ullormusianut kiisalu nerisaqarnermut ineqarnermullu aningaasartuutissat pillugit aalajangiisassaaq ataatsimiinnissaq sioqqullugu.

Siulersuisuunerit

§ 23.

Kattuffiup siulersuisuuneri ataatsimeersuarnerit nakkutilliisoqarfiullu ataatsimiinnerisa akornanni kattuffiup aqunneqarneranik isumaginnittuupput ataatsimeersuarnerni nakkutilliisoqarfimmilu aalajangikkat, tamatumani aamma inatsisit ataatsimeersuarnermi isumaqatigiissutaasut, naapertorlugit.

Imm. 2. Siulersuisuunerit inuttaqarput siulittaasumik, siulittaasup tullianik aamma siulersuisuunernut ilaasortanik arfineq-marlunnik, ataatsimeersuarnermi ukiunut sisamanut qinigaasunik. Siulersuisuunernut ilaasortat tamarmik oqaaseqarsinnaatitaallutillu, siunnersuuteqarsinnaatitaallutillu taasisinnaatitaapput.

§ 24.

Siulersuisuunerit suleriaasissaminnik namminneq aalajangersaassapput, soorlu qanoq aalajangiisoqartassaneranik, ullormut oqaluuserisassat sunik imaqarnissaannik, ataatsimiigiaqqusineri periaasissamik kiisalu siulersuisuunernut ilaasortanut akisussaaffinnik isumagisassanillu tunniussisoqarsinnaaneranik, tamatumani aamma aalajangigassat nukinginnartut qanoq suliarineqartarnissaat pillugu.

Imm. 2. Siulersuisuunerit ukiumut sisamariarlutik naapillutik ataatsimiittassapput. Tamakkua saniatigut pisariaqartitsineq naapertorlugu telefonikkut imaluunniit qarasaasiakkut allakkatigulluunniit ataatsimiittoqarsinnaavoq.

Imm. 3. Siulersuisuunerit kattuffiup missingersuusiortarnerinut akisussaapput, missingersuutit akuersissutigineqartassallutik qaammatisiutit ukiuat tullituttooq nallertinnagu siulersuisuunerit ataatsimiinneranni kingullermi.

Imm. 4. Siulersuisuunerit ataatsimiinnerinit imaqarniliat siulersuisuunernut ilaasortanut, § 16-imi aallartitatut toqqakkanut, peqatigiiffinnut attaveqaatinullu § 35-mi taaneqartunut SIK-p allattoqarfianit nassiunneqartassapput ataatsimiinnerup kingorna kingusinnerpaamik sapaatip-akunneri 3 qaangiutsinnagit. Tamatuma saniatigut siulersuisuunerit pisussaataapput sulinertik pillugu peqatigiiffinnut attaveqaatinullu § 35-mi taaneqartunut pisariaqartutigit ilisimatitsisarnissaminut.

§ 25.

Siulersuisuunernut ilaasortaq kommunalbestyrelsimut imaluunniit Inatsisartunut ilaasortatut qinigaaguni siulersuisuunernut ilaasortaaginnarsinnaavoq. Kisianni siulersuisuunernut ilaasortaq Naalakkersuisunut ilaasortatut toqqarneqaruni imaluunniit borgmesteritut qinigaaguni siulersuunernut ilaasortaaginnarsinnaanngilaq, ilaasortaajunnaartutullu naatsorsuunneqassaaq inissisimaffinni taaneqartuni sulilernini killigalugu.

Imm. 2. Siulersuisuunernut ilaasortaq politikikkut suliaqarnini pissutigalugu allamilluunniit pissuteqarluni siulersuisuunernut ilaasortatut suliassaminik isumaginnissinnaajunnaartutut naliliiguni, taanna siulersuisuunernut ilaasortaajunnaarluni aalajangersinnaavoq.

Imm. 3. Siulersuisuunernut ilaasortaq politikikkut suliaqarnini pissutigalugu allamilluunniit pissuteqarluni siulersuisuunerit ataatsimiinnerinut sivisuumik peqataasinnaajunnaartutut naliliippat, taanna siulersuisuunernut ilaasortatut sulinggiffeqartinneqassaaq.

Imm. 4. Siulersuisuunernut ilaasortaq kattuffiup aningaasaataanik atonerluisimasoq tunuartinneqarsinnaavoq siulersuisuunernut ilaasortaajunnaarsillugu. Aningaasanik atonerluisimaneq tunuartsinissaq pitinnagu kattuffiup kukkundersuisuanit uppersarneqassaaq. Aammattaaq tunuartsisoqarsinnaavoq siulersuisuunernut ilaasortaq paasissutissanik allagaatinilluunniit kattuffimmut ajoqutaasumik atorneqarsinnaasunik siulersuisuunernit akuerineqarnani ingerlatitseqqiisimappat.

Imm. 5. Imm. 1-4 naapertorlugit ilaasortaajunnaarnermi, sulinggiffeqartitaanermi imaluunniit tunuartaanermi siulersuisuunerni sinniisussaq qinersinermi § 9 nr. 109-mi taaneqartumi taaneqarnerpaasimasoq ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, kina siulersuisuunernut ilaasortanngussanersoq makitsissutigineqassaaq.

Imm. 6. Siulittaasoq politikikkut suliaqarnini pissutigalugu allamilluunniit pissuteqarluni piffissap qinersiviusup ingerlanerani ikerinnakkut tunuarusuleruni, siulittaasutullu suliaaminik isumaginnissinnaajunnaartutut naliliiguni, siulittaasuunerinit tunuarsinnaavoq.

Siulersuisuunerit taamatut pisoqarnerani aalajangersinnaapput § 15 naapertorlugu immikkut ittumik ataatsimeersuariaqqusisoqassasoq siulittaasussamik nutaamik piaarnerpaamik qinersinissaq siunertaralugu.

Imm. 7. Siulittaasoq siulittaasutut suliaaminik sivisuumik isumaginnissinnaangippat taanna sulinnigiffeqartinneqassaaq, siulittaasullu tullia siulittaasup suliaasaanik isumaginnilerallassaaq. Siulittaasup uternissaanik siulittaasutullu suliaaminik isumaginneqqilernissaanik ilimanartoqangippat siulersuisuunerit aalajangersinnaapput siulittaasup tullia siulittaasunngussasoq ileqquusumik ataatsimeersuarnissami tulliuuttumi siulittaasumik nutaamik qinersisoqarnissaata tungaanut, tamatumalu peqatigisaanik siulittaasup tullianik qinersisoqarluni aammalu sinniisussamik siulersuisuunernut ilaasortanngortoqarluni. Taamattaq siulersuisuunerit aalajangersinnaapput § 15 naapertorlugu immikkut ittumik ataatsimeersuariaqqusisoqassasoq piaarnerpaamik siulittaasussamik nutaamik qinersinissaq siunertaralugu.

Imm. 8. Siulittaasoq kattuffiup aningaasaataanik atornerluisimappat siulersuisuunerit ataatsimeersuarnermi inassuteqarsinnaapput taanna tunuartinneqassasoq siulersuisuunernut ilaajunnaarsillugu. Aningaasanik atornerluisimaneq tunuartsinissaq pitinnagu kattuffiup kukkunersiviusuanit uppernarsarneqassaaq. Siulersuisuunerit aammattaq ataatsimeersuarnermi inassuteqarsinnaapput siulittaasoq tunuartinneqassasoq paasissutissanik allagaatinilluunniit kattuffimmut ajoqutaasumik atornerqarsinnaasunik aamma siulersuisuunernit akuerineqarnani ingerlatitseqqiisimappat.

Imm. 9. Ataatsimeersuarnermi aalajangerneqarpat siulittaasoq tunuartinneqassasoq, siulittaasup tullia siulittaasunngussaaq ileqquusumik ataatsimeersuarnissami tulliuuttumi siulittaasumik nutaamik qinersinissap tungaanut, ataatsimeersuartut siulittaasumik tunuartsiniarlutik aalajangernerminnut malitsigitiinnarlugu siulittaasussamik nutaamik qinersiniarlutik aalajanginngippata.

Siulittaasup tullia ileqquusumik ataatsimeersuarnissap tulliuuttup tungaanut siulittaasunngorpat siulersuisuunerit siulersuisuunernut ilaasortat ilaannik siulittaasup tullianik nutaamik qinersissapput. Tamatumalu peqatigisaanik siulersuisuunerni sinniisussaq qinersinermi § 9-mi nr. 109-mi taaneqartumi taaneqarnerpaasimasooq siulersuisuunernut ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, siulersuisuunernut ilaasortanngortussaq makitsissutigineqassaaq.

Imm. 10. Imm. 6-imi aamma imm. 7-imi taaneqartunik pissuteqartumik siulittaasup tullia ikerinnakkut tunuarpat tunuartinneqarpalluunniit siulersuisuunerit siulersuisuunernut ilaasortamik siulittaasup tullianik nutaamik qinersissapput. Tamatumalu peqatigisaanik siulersuisuunerni sinniisussaq qinersinermi § 9-mi nr. 9-mi taaneqartumi taaneqarnerpaasimasooq siulersuisuunernut ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, siulersuisuunernut ilaasortanngortussaq makitsissutigineqassaaq.

Imm. 11. Siulittaasup tullia siulittaasup tulliatut suliassaminik sivisuunik isumaginnessinnaangip-pat taanna sulinngiffeqartinneqassaaq, tamannali kisiat pissutigalugu siulittaasumut tullugallartussamik qinersisoqartariaqarani. Siulittaasup tulliaata uternissaanik siulittaasullu tulliatut suliassaminik isumaginneqqilernissaanik ilimanartoqanngippat siulersuisuunerit siulittaasup tullianik nu-taamik toqqaasinnaapput. Tamatuma peqatigisaanik siulersuisuunerni sinniisussaq qinersinermi § 9-mi taaneqartumi taaneqarnerpaasimasooq siulersuisuunernut ilaasortanngussaaq. Sinniisussat arlallit amerlaqatigiinnit taaneqarsimappata, imaluunniit sinniisussat taasinertaqanngitsumik qi-nerneqarsimappata, siulersuisuunernut ilaasortanngortussaq makitsissutigineqassaaq.

Imm. 12. Siulittaasumik, siulittaasup tullianik imaluunniit siulersuisunut ilaasortamik tunuartitsinia-req aalajangiiffigineqartinneqartinnagu inuk pineqartoq periarfissaqartinneqassaaq tunuartinniarneqar-nerminut oqaaseqarfiginninnissaminut.

Imm. 13. Imm. 1-11 naapertorlugit aalajangiinerit piaarnerpaamik ilisimatitsissutigineqassapput peqatigiiffinnut kiisalu attaveqaatinu § 35-mi taaneqartunut.

Ulluinnarni aqutsisut allaffissornikkullu pisortaq

§ 26.

Kattuffiup ulluinnarni aqutsisui kattuffiup siulittaasuanik siulittaasuatalu tullianik inuttaqarput, taakku tamarmik Nuummi najugaqassallutik.

Imm. 2. Ulluinnarni aqutsisut suleriaasissartik namminneq aalajangersassavaat, soorlu akisussaaf-fimmik suliassanillu qanoq agguaanissaq pillugit.

Imm. 3. Siulittaasup aamma siulittaasup tulliaata akissarsiaat siulersuisuunernit aalajangersarneqas-sapput. Nuummut Nuummillu nuunnerni aningaasartuutaasinnaasut taamattaaq kattuffimmit aki-lerneqassapput. Pisariaqartitaq naapertorlugu inissaqartitsineqassaaq malittarisassat atuuttut ma-lillugit ineqarnermut akiliisoqartassalluni.

Imm. 4. SIK-p allattoqarfiani allaffissornikkut pisortamik atorfinitsitsinermut soraarsitsinermullu tunngasutigut aalajangigassat pisariaqartut ulluinnarni aqutsisut inassuteqarneratigut siulersuisuu-nerit aalajangiiffigissavaat.

Imm. 5. SIK-p allattoqarfiani allaffissornikkut pisortaq allattoqarfimmi allaffissornikkut sulisussanik pisariaqartunik atorfinitsitsillunilu soraarsitsisassaaq.

Peqatigiiffiit

§ 27.

Illoqarfinni nunaqarfinnilu SIK-mut ilaasortat 35-uppata amerlaneruppataluunniit peqatigiiffimmik SIK-mut atasumik pilersitsisoqarsinnaavoq.

Imm. 2. Peqatigiiffittut ilanngunniarluni qinnuteqaat siulersuisuunernut allaganngorlugu nassiunneqassaaq. Siulersuisuunerit qinnuteqaat itigartippassuk qinnuteqartut aalajangerneq naammagittaalliuutigisinnaavaat ataatsimeersuarnissamut tulliuttumut.

§ 28.

Peqatigiiffik SIK-mut atasutut akuersissutigineqarpat tamatuma kingorna qaammatit 3 qaangiutinnagit pilersitsiviusumik ataatsimeersuarneqassaaq, tassani peqatigiiffiup malittarisassai akuersissutigineqassallutik siulersuisunillu qinersisoqassalluni.

Imm. 2. Malittarisassat akuersissutigineqartut aamma ataatsimeersuarnermit pilersitsiviusumit imaqarniliaq SIK-p allattoqarfianut nassiunneqassapput, ataatsimeersuarnerup pilersitsiviusup kingorna kingusinnerpaamik sapaatip-akunneri 3 qaangiutinnagit.

§ 29.

Peqatigiiffimmi ileqquusumik ataatsimeersuartoqartassaaq siulersuisullu ataatsimiittassallutik peqatigiiffiup malittarisassai naapertorlugit. Ataatsimiinernit taakkunannga imaqarniliat SIK-p allattoqarfianut nassiunneqartassapput ataatsimiinnerit kingornatigut kingusinnerpaamik sapaatip-akunneri 3 qaangiutinnagit.

Imm. 2. Peqatigiiffiup malittarisassai minnerpaamik imaqassapput peqatigiiffinnut malittarisassani nalinginnaasuni kattuffiup ataatsimeersuarnerani akuersissutigineqarsimasuni, SIK-p malittarisassaanut ilanngussatut ilanngunneqartuni, aalajangersakkanik allassimasunik. Peqatigiiffiit malittarisassaat nalinginnaasut nutaat ataatsimeersuarnermi akuersissutigineqassappata peqatigiiffiit tamarmik ataatsimeersuarnissaminni tulliuttumi siullermi malittarisassatik pisariaqartutugut malittarisassanut nalinginnaasunut nutaanut naleqqussarlugit akuersissutigissavaat. Malittarisassat naleqqussakkat SIK-p allattoqarfianut nassiunneqassapput.

§ 30.

SIK-p inatsisai, tassa SIK-p malittarisassai peqatigiiffiullu nammineq malittarisassai, peqatigiiffiup malissavai. Taamattaq kattuffiup ataatsimeersuarnerani, nakkutilliisoqarfinni siulersuisuunernilu aalajangiinerit peqatigiiffiup malitassarai.

Imm. 2. Peqatigiiffiit tamarmik pisussaapput SIK-mut ilaasortamik kiffartuussissallutik, taanna nunnatsinni suminngaanneeraluarpalluunniit.

§ 31.

Kattuffiup ataatsimeersuarnerani siulersuisuunerit inassuteqarneratigut 2/3-mik amerlanerusuteqarnikkut peqatigiiffik SIK-mut ilaajunnaarsinneqarsinnaavoq peqatigiiffiup SIK-p inatsisai unioqutissimappatigut.

Imm. 2. Ilaajunnaarsitsinermik Kattuffiup ataatsimeersuarnerani aalajangerneq siulersuisuunerit peqatigiiffimmut allagaqarlutik nalunaarutigissavaat.

Imm. 3. Peqatigiiffimmik imm. 1 naapertorlugu ilaajunnaarsitsineq ilaasortaasunut ataasiakkaanut sunnuteqassanngilaq taakku akiliuteqartuaannarnermikkut SIK-mut ilaasortaaginnarsinnaamata. Peqatigiiffik SIK-mut ilaajunnaarsinneqarpat ilaasortat pineqartut peqatigiiffimmut SIK-mut atasumut qaninnermut attaveqalissapput.

Imm. 4. Uppernarsarneqarsinnaappat siulersuisut tamarmiunngitsut, peqatigiiffimmili siulersuisunut ilaasortaq ataaseq arlallilluunniit SIK-p inatsisaanik unioqutitsisimasut, soorlu ataatsimeersuarnermi, nakkutilliisoqarfimmi imaluunniit siulersuisuunerni aalajangikkat malissimanagit, kattuffiup ataatsimeersuarnerani siulersuisuunerit inassuteqarneratigut peqatigiiffimmi siulersuisunut ilaasortaq taanna imaluunniit siulersuisunut ilaasortat taakku peqatigiiffimmi siulersuisunut ilaasortatut tunuartinneqarnissaat kattuffiup ataatsimeersuarnerani 2/3-mik amerlanerusuteqarnikkut aalajangerneqarsinnaavoq. Taamaattoqartillugu peqatigiiffik peqatigiiffiup immikkut ittumik ataatsimeersuarnerani siulersuisunut ilaasortanik nutaanik qinersisoqassasoq siulersuisunut ilaasortat tunuartinneqartut amerlaqataannik.

Imm. 5. Imm. 1 aamma 4 naapertorlugit aalajangiisoqartinnagu peqatigiiffik pineqartoq imaluunniit siulersuisunut ilaasortaq pineqartoq suliamut tunngatillugu oqaaseqarsinnaatitaassapput.

§ 32.

Ukiuni kingullerni marlunni peqatigiiffiup naatsorsuutai kukkunerisukkat naapertorlugit ilaasortat agguaqatigiissitsinikkut amerlassusiat 35-t ataanniippat siulersuisuunerit peqatigiiffik nalunaarfiggissavaat peqatigiiffittut naatsorsuunneqarunnaartoq.

Imm. 2. Peqatigiiffiup naatsorsuutai kukkunerisukkat kingulliit naapertorlugit ilaasortat 35-nit ikinerulersimappata siulersuisuunerit pisussaataapput peqatigiiffik allakkatigut ilisimatissallugu 35-t inorlugit ilaasortaqaalersimasoq, taamaattumillu peqatigiiffik atorunnaarsinneqarsinnaasoq taman-na naatsorsuutini kukkunerisukkani tulluuttuni atuuteqqissagaluarpat.

Imm. 3. Peqatigiiffik imm. 1 naapertorlugu atorunnaarsinneqarpat siulersuisuunerit isummerfigissavaat aningaasat peqatigiiffiup atorunnaarsinnerani pigineqartut qanoq pineqassanersut.

§ 33.

SIK-p allattoqarfia pisussaaitaavoq peqatigiiffinnut qaammatikkaartumik ilisimatitsissuteqassalluni taakkua aningaasatigut qanoq ingerlaneri pillugit.

Imm. 2. Peqatigiiffik aningaasatigut annertuumik ajornartorsiortoq paasineqarpat SIK-p allattoqarfia ajornartorsiutit iluarsineqarnissaannut tigussaasumik ikiuutissalluni pisussaaitaavoq. Taamat-taaq SIK-p allattoqarfia pisussaaitaavoq peqatigiiffiup ingerlanera pillugu siulersuisuunernut ilisi-matitsissalluni, taamaalillutik siulersuisuunerit aningaasaqarnikkut pissutsinut akuliussinnaanias-sammata ajornartorsiutit iluarsineqarnissaasa tungaannut, soorlu peqatigiiffimmut pituttuisunik aalajangiussaqaarlutik.

Imm. 3. Peqatigiiffiup aningaasaataasa atornerlunneqarnerannik SIK-p allattoqarfia pasitsaassaqa-runi imaluunniit ilisimasaqalersimaguni pisussaaitaavoq tamanna siulersuisuunernut nalunaaru-tigissallugu, taamaalillutik siulersuisuunerit aningaasaqarnikkut pissutsinut akuliussinnaanias-sammata, soorlu peqatigiiffimmut pituttuisunik aalajangiussaqaarlutik.

Imm. 4. Tamatuma saniatigut peqatigiiffik ajornartorsiutigisami aqqinniarnernanni tapersorne-qarnissamik kissaateqarpat imaluunniit peqatigiiffiit arlallit akornanni ajornartorsiuteqarpat SIK-p allattoqarfia ikiuunnissamut pisussaaitaavoq. Taamattaaq suliffimmi inun- nut aalajangersimasunut tungasunik SIK-mut ilaasortat akuuffigisaannik suliassaqaartillugu SIK-p allattoqarfia peqatigiiffim- mut imaluunniit sulisut sinniisaannut peqatigiiffimmut atassuteqartunut sullissinissaminut aamma siunnersuinissaminut pisussaaitaavoq.

§ 34.

Peqatigiiffiup akisussaaffigaa suliffinni sulisut sinniisaannik qinersisoqartarnissaa malittarisassat atuuttut naapertorlugit, taamatullu aamma sulisut sinniisaat qinikkat pisariaqartumik oqaloqatigi-sarnissaat akisussaaffigalugu. Aammattaaq nakkutigisarissavaa sulisut sinniisaasa suliassaat, pisin-naatitaaffii pisussaaffiilu pillugit sulisitsisunik isumaqatigiissutaasimasut suliffinni malinneqarnis-saat.

Imm. 2. SIK-mut ilaasortaasunik sumiiffimmilu sulisitsisunik pisariaqartumik oqaloqatiginnittarnis-saq peqatigiiffiup akisussaaffigaa.

Illoqarfinni nunaqarfinnilu peqatigiiffeqanngitsuni attaveqaatit

§ 35.

Illoqarfinni nunaqarfinniluunniit SIK-mut atasumik peqatigiiffeqanngitsuni attaveqaatinik SIK-mut ilaasortaasunik peqatigiiffik qaninneq toqqaasassaaq.

Imm. 2. Sumiiffimmi pineqartumi SIK-mut ilaasortat, peqatigiiffiup qaninnerup kiisalu SIK-p allat-toqarfiata pisariaqartumik attavigineqarnerat attaveqaatip isumagisassaraa.

Imm. 3. Siulersuisuunerit aalajangersinnaapput attaveqaatit toqqakkat akissaateqassanersut imaluunniit sulinermit akissarsiassaraluaminnik annaasaqarnerminnut matussusiivigineqassanersut. Taamatut akissaateqartitsineq imaluunniit sulinermit akissarsiassaraluanik annaasaqarnermut matussusiineq peqatigiiffiup qaninnerup aningaasalersussavaa.

Isumaqatigiinniartarnerit

§ 36.

Isumaqatigiinniarnissat tulluuttut pillugit ataatsimeersuarnermit nakkutilliisoqarfimmilu aalajangiisoqarsinnaavoq. Tamatuma saniatigut isumaqatigiinniarnert sioqqulluarlugit ulluinnarni aqutsisut peqatigiiffinnut SIK-mut atasunut aamma sulisut sinniisaannut siunnersuutaasinnaasunik tusarniiasinnaapput. Peqatigiiffiit sulisullu sinniisaasa siunnersuutaat tigusatik ulluinnarni aqutsisut oqallisigalugillu pingaarnersiorlugit tulleriiaassavaat.

Imm. 2. Ulluinnarni aqutsisut isumaqatigiinniarnissat piareersarlugillu isumagissavaat, soorlu imm. 1-imi taaneqartutut aalajangiinerit tulleriiaarinerillu aallaavigalugit. Sulisut sinniisaat pisariaqartitsineq naapertorlugu peqataasinnaapput isumaqatigiinniarnert piareersarneqarneranni ingerlanneqarnerannilu.

Imm. 3. Ulluinnarni aqutsisut sulisitsisullu isumaqatigiinniarnermi angusaat atortussanngortinneqartinnagit siulersuisuunernit akuersissutigineqaqqaarallassapput.

Imm. 4. Ulluinnarni aqutsisut sumiiffimmi suliffeqarfimmik isumaqatiginninniaangata sumiiffimmi peqatigiiffik peqatiserineqartassaaq.

Imm. 5. Ulluinnarni aqutsisut sumiiffinni suliffeqarfinnut isumaqatigiinniarnernik piareersaaneq ingerlatsinerlu peqatigiiffimmut SIK-mut atasumut pisinnaatitsissutigalugu isumagisassanngortisinnavaat. Taamaattoqartillugu isumaqatigiinniarnerni piumasaqaatissat allannguutissanillu siunnersuutit ulluinnarni aqutsisunut akuersissanngortinneqaqqaarallassapput illua'tungiliuttunut saqqummiunneqartinnagit.

Sumiiffimmi isumaqatigiinniarnerni isumaqatigiittoqarsinnaatinnagu ulluinnarni aqutsisut isumaqatiginninnarnissamut pisinnaatitsissut tigoqqissavaat.

Imm. 6. Isumaqatigiinniarnernut atasumik sulinermik unitsitsinerit sulumajunnaarnerillu siulersuisuunerit akuersissuteqarnerisigut aatsaat pisinnaapput, taakku aamma SIK-p sulumajunnaar-

nissamut aningaasaateqarfiata sulumajunnaartunut ikiorsiisinaanera pillugu aalajangiisusammata.

Aningaasaqarneq

§ 37.

Peqatigiiffiit SIK-mut atasut tamarmik ilaasortamik akiliutissaannik peqatigiiffiup suliniutaanut atorneqartussanik aalajangersaasassapput. Kattuffiup ataatsimeersuarnera Nakkutilliisoqarfialu ilaasortat akiliutissaannik kattuffimmi suliniutinut atorneqartussanik, peqatigiiffinni suliniutinut tunngassuteqanngitsunik, aalajangersaasassapput.

Imm. 2. Ilaasortat illoqarfinni nunaqarfinnilu SIK-mut atasunik peqatigiiffeqanngitsuni najugaqartut ilaasortaannermut akiliutaat peqatigiiffiup qaninnerup aalajangersassavai akiliutit tamarmiusut ilaat sumiiffimmi atorneqartussat pineqarpata. Akiliutit ilaat taakku peqatigiiffiup qaninnerup pisassarissavai, akiliutilli tamarmiusut sinneri sumiiffimmi suliniutinut tunngassuteqanngitsut kattuffiup pisassarissallugit.

Imm. 3. Ilaasortaannermut akiliutip aalajangersarneqarneranut atatillugu aalajangerneqarsinnaavoq ilaasortat ilaat minnerusumik akiliuteqartinneqassasut uku:

- a. Piffissap ilaannaani sulisartut
- b. Ilinniagaqartut
- c. Suliffissaarusimasut sivirusumillu napparsimasut
- d. Soraarnerussutisallit

Imm. 4. Ilaasortaannermut akiliut PBS-ikkut akilerneqartassaaq. Sulisitsisulli sulisullu isumaqatigiisutiginnaavaat akissarsianik ilanngaanikkut ilaasortaannermut akiliutit akilerneqartassasut.

§ 38.

Siulersuisuunerit isumagisassaraat SIK-p siunertanut assigiinngitsunut aningaasanik sillimmateqarnissaa, tamatumunnga ilaalluni ilaasortat akiliutaasa ilaasa sulumajunnaarnissamut aningaasaateqarfimmut toqqorterneqarnissaat.

§ 39.

SIK-p naatsorsuutai, aamma peqatigiiffiit naatsorsuutaat, kukkunersiuisumit ataatsimeersuarnermi toqqarneqartumit kukkunersiorneqassapput.

Imm. 2. Kattuffiup naatsorsuutai siulersuisuunernit akuersissutigineqassapput, tamatumalu kingorna ataatsimeersuarnermi imaluunniit nakkutilliisoqarfimmut ilisimatitsissutitut saqqummiuneqassallutik. Peqatigiiffiit naatsorsuutaat peqatigiiffinni siulersuisunit susassaqtunit akuersissutigineqassapput, kingornalu peqatigiiffiit ataatsimeersuarnerini ilisimatitsissutitut saqqummiuneqartassallutik.

§ 40.

Peqatigiiffiit SIK-p allattoqarfianit naatsorsuuserissunneqassapput, SIK-llu allattoqarfia peqatigiiffiit netbankimi kontuinut pisinnaatinnegassaaq. Qaammatit tamaasa SIK-p allattoqarfia naatsorsuutit anillatsinneqarnerinik peqatigiiffinnut nassiussisassaaq.

§ 41.

Peqatigiiffiit SIK-mut atasut Ôdâq Olsenip Aningaasaateqarfianut ukiumoortumik aningaasaliisassapput. Aningaasat angissusissaat siulersuisuunerit aalajangertassavaat. Peqatigiiffiit siunnersuuteqarnerisigut, siulersuisuunerillu aalajangiinerisigut, aningaasaateqarfimmit nersornaasiisoqartassaaq.

Imm. 2. Ukiorpassuarni ilaasortaasimasut kajumissaatinik nersornaaserneqarsinnaapput nunani tamalaani sulisartut ulluanni tunniunneqartunik. Tamanna peqatigiiffiit siunnersuuteqareernerisigut pisassaaq, taavalu kikkut nersornaatisitinnegassanerannik siulersuisuunerit aalajangiissapput.

Imm. 3. Siulersuisuunerit ukiorpassuarni ilaasortaasimallutik suliunnaartunik ataqqinaammik ilaasortanngortitsisinnaapput. Siulersuisuunerit aalajangiisinnaapput ataqqinaammik ilaasortat ukiumoortumik aningaasassaqartinneqartassasut SIK pillugu suliaqarsimanerannut qujaniutitut.

Atsiorsinnaanermut malittarisassat akisussaanerlu

§ 42.

Siulittaasoq siulittaasup tullianik imaluunniit siulersuisunut ilaasortamik allamik peqateqarluni kattuffik sinnerlugu atsiorsinnaatitaavoq.

Imm. 2. Aalajangigaq sunaluunniit kr. 100.000-inik annerusumilluunniit nalilik iluanaarutissaappat aningaasartuutaassappalluunniit, missingersuutini siulersuisuunernit akuersissutigineqarsimasuni allassimangippat, isumaqatigiissutitut atsiorneqartinnagu siulersuisuunernut akuerisassanngorlugu saqqummiunneqaqqaarallassaaq.

Imm. 3. Kattuffiup ilaasortai, aamma siulersuisuunernut ilaasortat, kattuffimmut akisussaaffigitineqartunik sunilluunniit namminneq akisussaaffeqanngillat.

Malittarisassanik allanngineq

§ 43.

SIK-p malittarisassai taamaallaat kattuffiup ataatsimeersuarnerani aalajangernikkut allanngortineqarsinnaapput.

Imm. 2. Malittarisassat allannguutissaannik siunnersuutit SIK-p allattoqarfianut nassiunneqassapput piffissaliussat § 10 imm. 3-mi taaneqartut naapertorlugit.

Imm. 3. Malittarisassat allannguutaat ataatsimeersuarnermit aalangiiffigineqartumit atuutisapput.

Kattuffiup atorunnaarsinneqarnera

§ 44.

Kattuffik atorunnaarsinneqarsinnaavoq aatsaat 2/3-imik ataatsimeersuarnerni tulleriinni marlunni amerlanerussuteqarnikkut, ataatsimeersuarnerup aappaa ileqquusumik ataatsimeersuarnerussaluni. Taamaassappat aalajangerneqassaaq kattuffiup pigisai nalillit qanoq atorneqassanersut.

Ilanngussat: Peqatigiiffinni malittarisassat nalinginnaasut 2. septembari 2021-mi kattuffiup ataatsimeersuarnerani akuersissutigineqartut.

Akuersissutigineqartut ataatsimeersuarnermi ulloq 30. oktobari 2025.